

Dobel participacion tabatin su influencia positivo

S.A.C. a dedica festival na Queen Analia

DIASABRA ultimo na Aruba Entertainment Center a tuma luga e edicion espectacular di Calypso & Roadmarch Contest Infantil-Hubenil 2014 caminda un cantidad total di 24 hoben a participa y a demostra nan tal-

ento riba escenario. Un publico hopi anima a sostene e hobenan aki den nan respectivo categoria.

Stichting Arubaanse Carnaval, S.A.C., tabatin un programa bon hinca den otro. Maestronan



di ceremonia tabata Tio George y Addonsito Croes, kendenan a sa si haci un excelente trabao. E biaha aki SAC a dedica e contest na Analia Rasmijn, kende a gana e festival di Calypso & Roadmarch Infantil y Hubenil na 1991.

Queen Analia ta e prome mucha muhe cu a gana e Roadmarch Contest Infantil. Queen Analia, kende semper a haya e sosten 100% di su mayornan, Reynaldo y Olinda Rasmijn a hiba e titulo maximo pa 4 aña consecutivamente.

Na aña 1993 el a gana den categoria Infantil, cu e cantica ganado "I Love Aruba", composita y aregla pa Claudius Phillips. Cantica cu tambe a wordo canta pa Queen Analia na Corsou den "Caribbean Fest" y tambe na Boneiro. Na 1994 den categoria Infantil cu e cantica "Break Away" cu composicion di Claudius Phillips. Na 1995 cu e cantica: "Hise" cual tabata otro composicion di Claudius Phillips. E cantica aki tabata

uno recien saca for di forno, di awe pa mañan. Queen Analia a competi cune y a bay cu e titulo maximo. Na 1996 cu e cantica "It's Party Time" di King Computer q.e.p.d. hunto cu Federico Martis a skirbi e cantica y El-djean Juddan q.e.p.d. a agrega mas couplet y cual banda a toca e cantica tambe.

Na 1997, den categoria Hubenil cu e cantica "Branches" composita pa Chucho Hoek, cu cual cantica el a sali prome finalista. Na 1999 den categoria Hubenil cu e cantica "Let's Go Party" cu Banda Chups, unda el a keda como e di dos finalista. Na 2000 den categoria Hubenil atrobe el a keda na di dos luga. Queen Analia a bay cu mas titulo, cual ta 2 biaha "Best Dress" y tambe "Best Show", "Cantante mas popular" y "Queen of the Bands".

Analía a haya varios reconocimiento, manera Plakkaat di Dr. Lily Beke-Martinez e tempo

ey Minister di Cultura, como gradicimento pa su contribucion na nos Carnaval, Roadmarch/Infantil. Otro plakkaat entrega for di Prins Willem Alexander, pa su "dedicacion, perseverancia y logronan como cantante hubenil di nos pais Aruba". Tambe plakkaat como aprecio pa tur cooperacion cu Calypso/Roadmarch, Infantil/Hubenil pa 5 aña consecutivo. Pa tur esaki SAC a reconoce Analia Rasmijn durante su Calypso & Roadmarch Contest 2014 den cuadro di Carnaval 60 y ta expresa palabranan di pabien na tur e muchanan cu a participa di e festival haciendo un tremendo presentacion y engrandeciendo nos cultura. Riba potret por aprecia imagenan di e anochi aki y e premiacion cual a ser haci door di Presidente di SAC, Sra. Tecla Kelly. Pa mas informacion di SAC y di tur evento di carnaval, subi Facebook, riba e pagina facebook.com/stichtingarubaansecarnaval.